

Messadi

dalla grupp da fusiun dalla “Pleiv evangelica reformada Foppa” per mauns dallas radunonzas da fusiun dallas pleivs

Preziadas commembras, preziai commembers dallas pleivs evangelicas reformadas

Bugen informein nus Vus davart il project da fusiun dallas pleivs evangelicas reformadas. Per la fusiun basegna ei dus pass. Duront las radunonzas da fusiun fin uost 2026 decidan las singulas pleivs sch’ellas vulan acceptar il contract presentau ed aschia approbar la fusiun. A caschun dalla radunonza da fundaziun dalla nova pleiv evangelica reformada el november 2026 vegn la basa per quella nova pleiv discutada, acceptada e la nova suprastonza elegida.

Ina cuorta resumaziun en caussa anfleis Vus sutvart. Ils detagls appartenent il contract da fusiun ed igl uorden dalla pleiv anfleis Vus aschuntau a quest scriber e Vus saveis era s’informar per romontsch e tudestg sillas paginas da web da Vossa pleiv.

Radunonzas da fusiun dallas pleivs participontas

Las suandontas pleivs voteschan la fin d’uost duront radunonzas separadas davart il contract da fusiun presentau: Castrisch/Sevgein/Riein, Duvin, Ilanz/Glion, Luven, Pitasch e Waltensburg/Vuorz. La fusiun per 1. da schaner 2027 va mo en vigur sche tut quellas pleivs voteschan persuerter.

Contract da fusiun

Il contract da fusion regla las formalitads per ina fusiun. Tut las pleivs tochen dacheu vegnan integradas ella niev formada Pleiv Foppa. Quella surpren tut las activas, passivas sco era tut ils contracts e las obligaziuns dallas pleivs entochen dacheu. En quei document vegn medemamein la transiziun dallas pleivs tochen dacheu alla nova pleiv reglada.

Radunonza da fundaziun dalla Pleiv evangelica reformada Foppa

Las sis pleivs cumpigliadas fusiuneschan tier la nova pleiv Foppa. La radunonza da fundaziun ha liug el november 2026. A caschun da quella vegnan la presidenta ni il president, las suprastontas ed ils suprastonts sco era il revisorat elegi. Ulteriuras tractandas ein la cussegliaziun e la deliberaziun digl uorden dalla pleiv, la lescha da taglia da baselgia sco era la consultaziun dil budget ed dil pei da taglia pigl onn 2027.

Uorden dalla pleiv

Per Voss’informaziun cuntegn quei scriber gia ina proposta pil niev uorden dalla pleiv. Quel vegn discuss e deliberaus a caschun dalla radunonza da fundaziun.

Suprastonza e revisorat dalla Pleiv evangelica reformada Foppa

Tenor igl uorden dalla pleiv consista la suprastonza da silmeins tschun commemoras ni commembers (daplirs ei pusseivel). Ei fuss bi sche tuttas pleivs tochen dacheu fussen representadas ell'emprema suprastonza. La suprastonza ed il revisorat vegnan elegi durant la radunonza da fusiun.

Veta ecclesiastica

Il s uffecis parochials vegnan a restar el liug sco entochen dacheu. Era priedis vegn ei a dar en tut il s loghens ed ella regularitad usitada. Il motto ei "preservar tut quei ch'ei secumprovau aschi gitg sco pusseivel".

La grondezia dalla nova pleiv arva novas pusseivlads.

Aschia san ins per exempel porscher dapli projects per ina pli gronda gruppa da confirmandas e confirmands. Era per occurrenzas da seniors – seigi quei a caschun d'excursiuns, da viadis ni da suentermiezgis da giugs – san ins quintar cun dapli participontas e participonts.

Muort midadas da scantschala san ins porscher dapli priedis romontschs. In ulteriur avantatg d'ina pleiv pli gronda ei ch'ins sa porscher pensums pli attractivs per plevonessas e plevons. Quei ein mo entgins exempels.

Ina gronda midada vegn ei a dar tier l'organisaziun ed il menar dalla nova pleiv. Enstagl da tochen dacheu sis vegn ei mo pli a dar ina suprastonza ed in'administraziun.

Cefras e fatgs dalla nova pleiv Foppa

Diember da commembers (fin 2025): 1'489 (nr. 6 el Grischun)

Pertschien da plazzas da plevonessas e plevons: 245% (senza uras da religiun)

Pertschien dil secretariat: 45% (senza contabilitad)

Diember da baselgias: 7

Diember da Casas pervenda: 5

Recumandaziun dalla gruppa da fusiun allas radunonzas dallas pleivs:

La gruppa da fusiun recumonda unanimamein e cun perschuasien dad acceptar il contract da fusiun.

La damonda da votaziun per las radunonzas dallas pleivs secloma:

Vuleis Vus acceptar il contract da fusiun dallas pleivs da Castrisch/Sevgein/Riein, Duvin, Ilanz/Glion, Luven, Pitasch e Waltensburg/Vuorz tier la nova Pleiv evangelica reformada Foppa?

La gruppa da fusiun dalla "Pleiv evangelica reformada Foppa"